

09/10/1997

Dr Mahathir hargai sokongan rakyat

KUALA LUMPUR, Rabu - Datuk Seri Dr Mahathir melahirkan rasa terhutang budi dan menghargai sokongan yang diberikan rakyat, termasuk parti pembangkang kepada beliau dan kerajaan dalam menghadapi serangan terhadap ekonomi negara.

Menurut Perdana Menteri, serangan terhadap ekonomi Malaysia itu, terutama Bursa Saham Kuala Lumpur (BSKL) dan mata wang negara, adalah masalah nasional yang membabitkan keseluruhan rakyat negara ini.

"Sokongan itu adalah petanda baik betapa rakyat, tanpa mengira sama ada mereka menyokong kerajaan atau tidak, bersedia bersatu untuk menghadapinya.

"Saya tahu kalau cuma parti kerajaan saja atau kawan-kawan saya saja yang sokong maka media asing, pedagang mata wang ini akan berkata bahawa saya merancang sokongan ini.

"Kita tahulah parti pembangkang di sini bukan mudah nak menyokong kerajaan, nak sokong Perdana Menteri. Tetapi dalam perkara ini (serangan terhadap ekonomi negara) kita bersatu padu dan menghadapinya sebagai sebuah negara bebas," katanya kepada pemberita di lobi Parlimen, di sini petang ini.

Dr Mahathir diminta mengulas sokongan padu segenap lapisan rakyat, termasuk parti pembangkang kepada beliau dan kerajaan ketika ekonomi negara diserang oleh pengurus dana dan media asing baru-baru ini.

"Saya berasa terhutang budi dan menghargai sokongan ini. Ini adalah masalah nasional. Apa yang berlaku kepada kita terkena kepada semua orang. Bukan kena kepada kerajaan saja atau parti kerajaan saja.

"Semua orang sama ada penyokong kerajaan atau bukan penyokong kerajaan sudah menjadi lebih miskin sebanyak 25 peratus daripada dahulu. Jadi memang baiklah kalau kita anggap ini sebagai masalah nasional dan kita bersatu menanganinya," katanya.

Ditanya adakah dengan sokongan ini kerajaan akan terus menentang, Perdana Menteri berkata, beliau dan kerajaan akan terus melawan ketidakadilan yang membelenggu negara membangun akibat serangan bertubi-tubi oleh manipulator dan spekulator perdagangan mata wang.

Menurutnya, pedagang mata wang yang tidak bertanggungjawab itu meraih keuntungan bukan sedikit, malah ribuan juta ringgit, sekali gus memiskinkan lagi negara yang sudah miskin.

"Nampak macam ada sejenis perang. Dia serang, bukan berniaga," katanya.

(END)